

NYIEX SIMUIK SIMIEANG TAX SAH



ရွှေတောင်ပိက္ခန်းပူဇော်ကုန်း၊ လားရှိုးမြို့၊ အောက်(၆)ဆက်

GRAH GRAWNG KRAX IM JU

(SIMIEANG TAX SAH)

(12.12.1900 - 13.10.2003)



ဦးဘဆု၏ အတ္ထုပ္ပတ္တိ

(၁၂.၁၂.၁၉၀၀ - ၁၃.၁၀.၂၀၀၃)

**GRAWNG: KRAX IM JU  
SIMIEANG TAX SAH**

တရားရုံး အဖွဲ့အစည်း

## LOX TAWM:

Yaogyaw bwan son Simieang Siyiex ting lhaong tete telai heue. Can ex pa mawh kawn praix simieang Tax Sah khan kix, keut sawn sonsang koe bwan son, son kawn praix, mai: kawn saux, kawn sex, kawn suix, tix ju hoik tix ju, sonsang tawng grawng : tax du tix simieang Tax Sah, mai: sonsang mawh pa gau: kix ka ceu pa mhawm , pa koe ka daux pa im ju simieang Tax Sah , pa mawh tax du ex heue. Mawh kheu nan ex tom tiem grawh grwng: krax im ju nawh, mai: yuh kieh lih koe kawn phuk lai ieak tix phuk, sonsang mawh pa deuk pa koe son kawn praix, nawh tix ju hoik tix ju heue.

Pa tiem ex grawh grawng: krax im ju Tax Sah in, ang doh grum naog tix bawg kawx heue. Vieang mawh kawx nan, Lox krai nawh , mai: kaing yuh nawh pa mhong pa yaox ex khaing nawh khankix, ex deeh kraix khawm tau, mai: yuh mawh kawn phuk lai ieak in heue. Can ceu pa mhong pa yaox ex khaing keeing ex simieang Tax Sah, pa mawh lox krai lox lao nawh, mai: kaing can pa yuh nawh khankix khawm uik, yam deeh tiem tix yuh kieh mawh phuk lai ieak in, koe dee cod dee cha tom nie heue. Can tax yiex miex keeing, pux aik pux o khankix, pa phat ka lai in, phan yaox dee phit lud cod cha, can ceu pa krai pa lao mai: pa tiem grawng: keeing ex simieang Tax Sah, pluat ploi phimap ex lieak. Can ex pa mawh kawn praix Tax Sah ku kaux, rawg bwan son pa nhim, pa gaux rhawm pa nyawm ot nyawm koe, Lih koe ka pieang can pwi pa phat ka lai grawng krax im ju keeing ex simieang Tax Sah khan kix khawm uik heue.

## Lox jah

Can kix tax yiex miex keeing, tax du yiex die, pa hoik hu sivoex, pa hoik glip ngai grai lox khan kix, kix mawh pwi pa hoik thong gau ka ex ka ku ceu ku cawng heue. Can krax im ju kix tix baux hoik tix baux, tix bawg yam hoik tix bawg yam pa chix tieh chix loh ku ceu an, kix koe ceu pa yaox pa tawng ku ceu, mai: koe ceu pa yaox tix kham: geu ku ceu heue. Ceu pa sipub kix tix yaox ka dau pa im ju kix tom nie an, chix koe ceu pa ang ex sax tawng sax mhong, pa mawh krax yaox krax mhong pa tang siyox son ex tom nie ceu heue. Phan yaox tix phat tix mhong, grawh grawng: krax im ju kix tax yiex miex keeing, mai: tax du yiex die ex pa hoik grai ngai khankix, ex sang pon rieng rao son krax im ju tix, mai: mawh pa kiek ex koe krax lhak krax haing:, mai: krax chix krax tawng tom nie ceu heue.

Ka dau krax im ju pwi tix kaux kaux, yie chix koe pa mhawm tom nie, mai: yie chix koe nang

pa caox pa ang mhawm khankix heue. Pa mhawm mai: pa caox khankix an, mawh pa yiex brawm: tix koe tau ka daux pa im ju kawn pwi ka pieang haktiex in khawm uik heue. Can ceu pa yuh ka mawx ang ah, mawh pa chix kieh ex pon ceu pa gau son krax im ju kawn pwi heue. Can ceu an khankix khawm uik, mawh ceu pa kieh ex goih tix tawng pa mhawm mai: pa ang mhawm, mai: chix tawx krax tawng krax yung, mai:krax lhak krax haing: ka son krax im ju ex heue. Yam keut ex tix yaox ka krax pa im ju kix tax yiex miex keeing, mai: tax du yiex die ex khankix, ex tom tiem grawh grawng: krax im ju keeing ex simieang. Tax Sah, mai: yuh kieh lih mawh phuk lai tix phuk ka son ju kawn praix tix ju hoik tix ju heue.

### **Grawng: yam jah krax im ju Tax Sah**

Tax Sah mawh kawn simex tax Nyi Pleck mai: yiex Yex Kap, pa ot ka daux veng Yaong Soi, pa koe ka daux haktiex meung Hawx yam in heue. Tax

Sah keh ka daux 1990 num haok khix kao ra (12) singaix, phan sawn khix pieang kaing:, caw khix Leun kam: heue. Dee keh Tax Sah daux veng Yaong Soi an, mawh ka daux meung vax, pa caw tix koe ka daux Meung Hawx yam in heue. Phan mawh veng Yaong-Soi an, mawh kheu mawh yaong pa jah pwi tix kaux, pa kaux tax Ai Soi tix pang: yam jah dix, mai: tom kok ceu kaux veng an mawh veng Yaong Soi heue. Veng Yaong Soi mawh dee sidaing haoh hun jung pwi, pa mawh veng pa kied geu ka daux haktiex ex paraog tix veng heue. Simieang Tax Sah keh ka daux veng an mai: ting lhaong ka daux veng an tom koe nyiex ma: nawh heue. Jah ka ju tax du yiex du nawh dix , kix hoik dawg mawh pwi pa ot ka daux haktiex an heue. Phan krai ru ceu cad doh dieang simieang Tax Sah, kawn pon tix tawng ka tax du kix tom hoek phwan ju heue. Tax du kix pa kawn pon tix tawng an, jah ka Tax Khoi, khaix an tom baox mawh Tax Liao. Khaix an baox mawh Tax Thai, khaix an tom baox mawh Tax Cang, an baox Khaix mawh Tax Pleck

heue. Tax Pleck mawh keeing simieang Tax Sah heue. Can pa hoik tiem ceu kaux plak picang tin phwan kaux in, mawh ru ceu cad Tax Sah, jah ka tax du nawh khankix, tom hoek ka keeing nawh heue. Pux aik pux o Tax Sah khankix koe khawm uik sidaix kaux heue. Simex aliah kaux mai: Sibon tix kaux heue, ka daux kix pux aik puxo sidaix kaux an, simieang Tax sah, mawh kawn ghoik, pa ieak khaing paox tix heue. Can kix pa mawh pux aik pux o Tax Sah aliah kaux an, hoik dawg yum tom yam awn ju kix heue. Sidah mawh ngie Tax Sah. tix kaux nong nong pa klawd sinax kix heue. Tax Sah klawd sinax pux aik pux o nawh khankix, mai: lang: prim im rheung, tom koe ju nawh 103 num heue.

**Grawng: yam lih mawh Tax Sah nyiex ma:**

1917 num daux khix pon, Tax Sah yuh tix koe nyiex ma, mai: teei koe moeng ka pa kaux I Ka heue. Tax Sah koe kawn praix mai: yiex I ka aliah

kaux, kawn simex pon kaux mai: kawn sibon loe kaux heue. Can kix pa mawh kawn praix Tax Sah (7) kaux an chix ih rhawm rhi simau paox tix mai: haok huan ting lhaong ka plak nex plak nham, mai: plak krax keut krax sawn tix singaix hoik tix si ngaix heue. Nyiex ma nawh koe krax haok krax huan , mai: kix chix ih rhawm rhi paox tix tix kaux lai tix kaux heue. Nyiex ma kix koe pa nyawm rhawm nyawm rhi, kheu kix ang koe pa simah simaing: mai: ang koe pa thung thieang ka paox tix, lox tix mu hu tix dieang: ka daux kaing jhaw pa yuh tix ku ceu heue. Rhawm ang tang rhang ang siyox, mai: gaux rhawm gaux rhi tau, ka daux pa chix cu ngied ka lox miex keeing mai: ka lox paox tix, tix kaux lai tix kaux heue.

Khai hoik kied rheung num, Tax Sah baox teei ka yiex Am Sang mai: mawh nyiex ma: tau ka daux pa kied koe krax moh krax rhawm mai: pa chix ih rhawm rhi simau paox tix heue. Siyiex baox tawx bwan son ka nyiex ma: kix, mai: baox pon kawn praix mai: yiex Am Sang aliah kaux, kawn simex loe kaux

mai: kawn sibon pon kaux heue. Nyiex ma Tax Sah baox koe krax pa haok huan mai: baox nied tix chix ih rhawm rhi simau paox tix tix kaux lai tix kaux heue. Kheu pa chix ih kix rhawm rhi simau pao tix, mai. kheu pa chix cu ngied ki ka lox tax yiex miex keeing tix, nyiex ma: kix, koe pa haok huan plak kaing jhaw can pa yuh tix ku ceu heue. Tax Sah chix thong chix gau ka kawn nyiex kawn ma: nawh , mai: ang kieh pa simah simaing koe ka daux nyiex ma: tix heue. Can kix pa mawh kawn praix Tax Sah khankix khawm uik, cu ngied ka lox pa gau pa sidiex miex keeing tix ku bawg ku yam , mai: moh paox tix mai: chix yuh kaing pa mhawm teem coi ka miex ka keeing tix ku bawg ku yam heue. Mawh kheu pa ih kix rhawm rhi simau paox tix, nyiex ma: Tax Sah nied tix haok huan plak krax lah krax lai mai: haok huan plak kaing can pa yuh tix tix ceu hoik tix ceu heue. Krax ih krax un kawx, nied tix kub tix lheu tix ngaix hoik tix ngaix heue.

Khaix hoik baox kok Siyiex tix teei ka Yiex

Am Sang pa mawh moeng Tax Sah, nawh baox teei tix mawh nyiex ma mai: Yiex vox kap heue. Vieang mawh nan, kawn praix ang lai koe tau mai: Yiex Vox kap heue. Mawh kawn sibon pa viex yiex Vox kap hoek ra kaux khaing heue. Phan simin mai: deeh sawn: tix yaox cub kawn praix Tax Sah khankix ku kaux, jah ka kawn kwad plix num:, tom sidah ka kawn ghoik pa ieak khaing paox tix, ex pon tix tawng ka kix awm in pa koe plak greem heue. Jah ka pa ting tom hoek ka pa ieak tix kaux hoik tix kaux, tia: tix tiem ceu kaux kix tix kaux hoik tix kaux awm in heue.

- (1) Nyi kap
- (2) Sam kat
- (3) Sai Tao
- (4) Ngox Nap
- (5) Ai Nap
- (6) Nyi Tao
- (7) Sam Vah ( Sam ka )
- (8) Yex Khwat

- (9) ILha
- (10) Am Pha
- (11) Am Rai
- (12) Iet Meung
- (13) Vox Sang
- (14) Ip Rux

Ka daux can kix pa mawh kawn praix Tax Sah kao pon kaux an, kix hoik grai ngai (8) Kaux, mai: kawn im ju yam in (6) kaux heue. pa kawn im ju yam in , mawh kix in pa koe ceu kaux plak greem tin: heue.

- (1) Tax Ngox Nap
- (2) Yiex I Lha:
- (3) Yiex Am Pha:
- (4) Tax Sam Vah ( Sam Ka:)
- (5) Yiex Voh Sang
- (6) Yiex IP Rux

Can kix kawn praix Tax Sah ku kaux, kix hoik tang koe nyiex ma, mai: tang ot nyiex ma mawx nyiex ma: an heue. kix koe kawn praix ku nyiex ku

ma: kix, mai: kawn praix kix haoh hun heue. Kawn prai Tax Sah khan kix, tix blah, hoik pon kawn saux tix, mai: tix blah kawx, hoik koe kawn sex heue. Phan deeh sikaw tix yaox ka cub caw kawn praix Tax Sah khankix kienie, Can kawn praix nawh simex sibon-khawm uik koe(14) kaux, mai: kawn saux khawm simex sibon khawm uik koe (81) kaux, mai: kawn sex khawm simex sibon khawm uik, koe (90) kaux mai: kawn suix koe (1) kaux heue. Phan kleuk tau, can kawn praix, kawn saux, kawn sex, kawn suix Tax Sah khawm uik khawm leeing koe (172) kaux heue. Vieang kawn praix nawh koe tom nie haoh hun: kawx, kix moh ka paox tix, mai: ang koe pa simah simaing ka tix nyiex lai tix nyiex, tix kaux lai tix kaux heue. Mawh kheu Tax Sah chix moh ka kawn kheue tix khankix, mai: moh ka Mun tix khankix, mai: ka can kawn saux kawn sex nawh khankix khawm uik heue. Mawh kheu Tax Sah chix moh ka moeng kawn tix, mai: ang sax yuh simah ka daux nyiex ma tix, can kawn praix nawh khankix, hawt been pa thong pa



gau keeing tix, kheu nan, kix tom koe krax moh krax rhawm ka paox tix heue.

Tax Sah yie sidiex gau kawn praix tix ka grawng pa ang caw tix kieh koe simah simaing, mai: pa caw tix ih rhawm rhi simau paox tix ka kawn nyiex kawn ma tix yam mawx ang ah, sidiex gau kix moh ka paox tix, mai sidiex kix moh ka pwi yaong khankix heue. Awm pa ang kieh simah koe sinax kawn praix tix khankix, sinax kawn yaong kawx, sidiex gau nawh son sang ang koe pa simah simaing heue. Lheu khaing an, sonsang chix moh kawn praix nawh khankix ka nyo sinie kawx, nawh sidiex gau ka kix ku jheeng jheeng heue. Tax Sah yie krai ka kawn praix tix khankix yuh nin, ceu pa priex ka nyo sinie, mawh pa yuh krax tan pa jiet mhawm tix ceu heue. Nawh krai kix mhong grawng: nyo sinie khankix, chix viex bwan son ku ceu heue. Nyo sinie khankix, yie mawh kawn cau pa ploi cao haktiex cao raoma: , ah nawh nan heue. Nawh gau kawn praix tix moh ka nyo sinie, mai gau kix priex rien khan kheu ka pwi

hoek pwi hu khankix heue. Nyo sinie pa kaoh khaing ku krax ku laux, khawm hawx khawm shieam, pwi hoek tix paung pan daux nyiex ma: Tax Sah, mawh kheu kawn nyiex ma: nawh khawm uik koe rhawm rien tix priex ka nyo sinie khankix heue.

**Pa dha Tax Sah tix cox khre ka son  
kawn praix nawh khankix**

Tax Sah jiet chix moh ka kawn praix awm paox tix ku kaux ku pwi heue Nawh ang koe rhawm tang siyox ka pieang Kawn praix tix simex sibon pie tix bawg kawx heue. Yam mawx ang ah, nawh keut sawn grawng krax ot krax koe kawn praix tix, mai: dha tix cox khre can pa lo ka son nyiex ma: kawn praix tix heue. Nawh ang lai fah rhawm ka pa hoik sidiex gau ka kawn praix tix, vieang kaing pa keung pa caw kix tix yuh, mai: pa koe bwan son son: kix ku ceu, nawh jhi daux krax ka kix ku jheeng jheeng heue. Nawh cox khre tix deuh can pa caw tix cox khre ku

ceu, mai: sawg daux krax haok huan ka son kix heue. Nawh sawg daux krax lah krax lai son kix, mai: sawg daux krax lhak krax haing: son sang pon gau can kawn praix nawh ping nya cuyi heue. Khai an nawh kawn sawg dee yuh kaing ma: kaing kaung mai: dee ot dee koe pa mhawm ka son kix can kawn praix tix khan kix heue. Mawh kheu sidaing chix yaox chix tawng Tax Sah ka krax ot krax koe haktiex pa chix lih mawh ku ceu, nawh tom pon sawg daux krax haok krax huan son kawn praix tix, mai: son pwi ceu cie nawh khawm uik heue. Rhawm rhi nawh, keut sonsang koe krax haok huan krax chix krax tawng, krax ot krax koe mai: krax lah krax lai, ku ceu ka daux haktiex dee ot dee koe tix, mai; daux nyiex yaong tix, mai; daux ceu cad kawn praix nawh khaukix ku jheeng jheeng heue.

Yam sawg nawh daux krax chix krax tawng son kawn praix tix, nawh jah tix pon ploi kawn simex tix, ra kaux hu gau lai daux haktiex hawx, mai; hu tawx ot k ka daux veng Khui Ming heue. Veiang

mawh nan, kheu jao grawng krax ot krax koe ku ceu, kiex ang tien ot rheung num, Phai yaox tix deeh ing heue. Yam an baox ploi kawn simex hu plak veng Cing Tung, mai: veng Nam Kham; sonsang gau kix pingnya cuyi heue Tix baux hoik tix baux, nawh baox ploi kawn praix tix tix kaux hoik tix kaux, hu tix gau pingnya ka daux veng pwi meung dee dex tix blah dee singai praix heue. Baox ploi tix blah hu plak veng Taong Jhi, mai: tix blah hu plak Veng Tang Yan, mai: tix blah hu plak La Shio heue. Mawh kheu kawn praix nawh khankix ting taix lhaong caong mai: koe cuyi pingnya, yaox pa yuh mhong pa krai pwi, mai: pon krax lhak krax haing: kaux pwi mawx kaux pwi an heue. leak angah, nie angah, Tax Sah mawh pwi pa koe rhawm tix tawx krax chix krax tawng ka kawn praix tix khankix, mai: chix thong bung ka kix ku jheeng jheeng heue. Kawn praix daux nyiex daux yaong khankix kawx, thong gau ka miex keeing kix, sonsang chix tawx pwi kix krax lhak krax haing: ka kawn praix tix khankix heue.

Tax sah mawh keeing pa koe rieang susai mai: chix dha tix kok yaox, kok puan sivoe tix heue. Mawh kheu jao an, vieang nawh ot dee ' nu dee khawm: mie ding angah , nawh coca tix ploi kawn praix tix gau lai , mai: kieh kix koe krax yaox krax tawng kheu keut nawh son bawg yam pa sang hoek son pwi ceu vax angah , son ceu cad kawn praix tix khankix angah heue.

Khaix hoik coca Tax Sah tix ploi kawn praix tix , tix kaux hoik tix kaux gau lai ka daux hak tiex dee singai , nawh baox sidiex gau thong bung ka kawn praix pa ang lai pon hu dee singai praix, kieh kix chix yuh tix ih lah lai , mai: kieh kix chix gau tix chix yuh kaing krax haok huan son nyiex ma to kaux tix ku ceu heue. Nawh gau thong kix ka been ot kawn pwi , mai: gau kix mawh pa chix im ju ka daux pa koe bwan son , son pwi mai: son nyiex ma tix heue. Kawn praix nawh kawx , cu ngied ka lox pa krai keeing tix Tax Sah , jheeh ang tang rhang ang siyox , muah tix ree , ceu tix mu , lox tix gum , cum tix dah

, ot tau hu tau ka daux pa moh pa rhawn ka paox tix heue. Yam ot kix ka dau yaong lawx , nawh kok khrawm: ka can kawn sibon nawh khankix aliah kaux , mai: khaix hoik sidiex gau nawh ka kix, nawh teei kraung khrai pa mawh kraung mau , kraung khri, mai: goih tix tawx ka kix kaux pwi mawx, kaux pwi an heue.

Phan keut tix yaox ka krax im ju Tax Sah , dee ot nawh dee mawx angah , dee hoek dee hu nawh dee mawx angah, nawh sidaing coca tix yuh kaing son pwi nyiex pwi yaong , mai: son kawn nyiex kawn ma tix heue. Nawh simie tix kieh kawn rai pwi sin khankix , mhawm ot siu koe , mai: simie tix kieh pwi kub ih kub un ku nyiex ku ma heue. Mawh kheu nan, yam hoik luan hu pwi daux ma, nawh yie lailing bing: yaong mai: yie sawg tix jieang ka pwi pa niex pa ang rhawm yuh tix ih kaing khan kix , phan nawh yaox pwi yuh nan, nawh sidiex gau ka kix heue. Bawg tix blah , nawh hu lailing daux ma daux kaung pwi . mai: sawg tix gaig yaox kaing yuh pwi yaong khankix

heue. Pwi mawx pa mhawm nghox ma yuh, mai: pwi  
 mawx pa ang mhawm nghox ma yuh, phan ang mawh  
 nan , mawh pwi mawx pa riem ma hu, mawh pwi  
 mawx pa bah pa jhang: ma: hu , nawh yie lailing tix  
 jhak bawg tix blah heue. Phan nawh hoik tawng ka  
 kaing yuh pwi yaong nyiex mawx nyiex an , bawg  
 yam koc grawng, nawh kok khrawm: pwi yaong hoek  
 , mai: krai lao grawng krax haok huan , mai: grawng  
 pa sang kieh non ningva son krax im ju tix, mai:  
 son kaing jhaw can pa yuh tix khankix heue. Krax pa  
 coca Tax Sah tix keut sawn, son pwi haktiex mai:  
 son kawn praix nawh khankix, ang lai mawh ceeix  
 ceeix ngie khaing:, hoik mawh pa sidaing ting lhaong  
 , mai: pa keung tix yaw min tete heue.

Ka dauh haktiex Yaong Soi, koc rawm rawng  
 ting ti mu, rawm rawng an , kok ceu kaux mawh  
 rawm: rawng Tax Sah heue. Grawh grawng: nawh ,  
 sivoe baux ju Tax Sah , rawm rawng an , ang koc  
 tong kaung tom nie heue. Khaix an, Tax Sah jah tix  
 tan: rawm, mai: yuh rawng rawm: pa khraox , son

sang chix yuh pwi haktiex , tix sawm kaung tom vieh  
 tom va heue. Khaix hoik yuh lung yuh loi Tax Sah ,  
 tix kieh pwi kaung rawng rawm: , mai pwi yaong  
 baox thien baox thic tix yuh kaung: khraox tom nie,  
 tom tin tix mawh tong kaung pa vieh pa ting , mai:  
 pwi tom nie yaox tix yuh sawm kaung ka haktiex  
 praix an heue. Pwi tom nie yaox tix yuh kaung, mawh  
 kheu kied mhawm rawm: heue. Khaix hoik bung  
 thong Tax Sah pwi yuh rawng ; mai: yuh kaung tan ,  
 vawng: simieang Hawx yaox pa khaw: caw: , mai:  
 kix baox thien tix tix cox yuh , kieh mhawm khaing  
 pa hoik koe glang: ka heue. Kix yuh guh rawng an  
 ting , tom chix haoh cag cheu hu ka pieang guh rawng  
 an heue. Yam in , hoik lih tix mawh krax ting tix  
 nyaing: ka pieang an heue. Mawh kheu Tax Sah jah  
 tix kaw: num, yuh sivoe paox tix , tom yam in , pwi  
 kok rawng rawm: an , mawh rawng Tax Sah heue.  
 Phan jhak tix yaox ka kaing pa yuh Tax Sah , mai: pa  
 dha nawh tix cox khre, son bawg yam sivoe ngai.

kheu krax pa dha nawh tix cox khre , kawn nyiex kawn ma nawh , mai: pwi nyiex pwi yaong , mai: pwi haktiex khankix , baox mhawm ot siu koe , mai: nie lheu kub ka ceu pa ih pa un, khaing glang ka singaix pa hoik luan heue.

**Dee bleeh ceu kaux Tah Sah mai: yam kawn awn ju nawh**

Khaix hoik keh Tax Sah, yam jah miex keeing nawh tix sum ceu kaux nawh, Kix kok ceu kaux nawh mawh Ciet Kap heue. Nawh mawh kawn simex liah kaux tix kaux ka daux kix pux aik kxanhix heue. Jah yam ieak nawh, nawh koe ceu pa tang siyox khaing pux aik nawh khankix heue. Nawh phai ting phai huan mai: sidaing phai taix phai caong, phai jheex phai lox heue. Lheu khaing an, nawh si daing koe rhawm haing: hia:, mai: lhak haing mai: chix viex rhawm rien: tix yuh kaing jhaw mhawm mhawm heue. Nawh mhawm krax nyawm ot tom yam ieak yam aw nawh

heue. Nawh chix yuh paox pie mai: pwi khawm uik, mai: koe paox meed paox tawng, paox grawm paox gruh tom nie heue.

Ceu kaux Tax Sah tete, pa jah miex keeing nawh tix sum, kok mawh Ciet Kap heue. Khaix an ot sipie ting lhaong sipie, nawh sidaing awm been Tax Sah pa ot daux yaong Nam Mhat. heue. Tax Sah mawh kwad yaong, yaong Nam Mhat heue. Yam yaox paox nawh jiet chix awm nawh been krax ot krax koe kwad yaung Nam Mhat pa kok mawh Tax Sah an, paox nawh pa mawh 'Tax Veng' tom nak nawn kok ceu kaux kawn pha tix Ciet Kap mawh Tax Sah heue. Khaix an, pwi lang liex tix kok nawh mawh Tax Sah tom singaix heue. Tom yam ieak nawh, nawh jiet chix ot awm pwi ting heue. Been krai nawh lox sikah angah, been ot been ngawm nawh angah, jiet chix awm pwi ting heue. Pwi khawm uik, moh ka been ot Tax Sah tom yam kawn mawh nawh kawn nyawm ieak heue. Mawh kheu jiet chix awm nawh been ot kwad khan kix mai: chix yuh chix krai lox

awm pwi ting khankix heue. Mawh kheu nan khaix hoik kok Tax Veng paox Tax Sah, Ceu kaux kawn pha tix mawh Tax Sah, pwi kok nawh mawh Tax Sah tom sidah uik ju nawh heue.

Tax Sah mawh ru Yaong Kaung, phan mawh plak lox hawx, mawh ru thing ca: heue. Ka daux bawg yam baux an, ka daux haktiex Yaong Soi, Hawx raoh mai: Hawx paing lai loh paox tix hoek kraix khrawm ka kawn rai pwi meung heue. kawn rai pwi meung khankix kawx, ot ka daux sinax krax kwang kiex in khawin ra cub heue. Vieang mawh kawx nan, kheu mawh bawg yam sivhax sivhaing vawng ra vawng, tix kraix khrawm: ka kawn haktiex, mai: si vhax tix ghrang: kwang meung ka paox tix heue. vieang mawh kawx nan, kix ang nyang pon kieh haktiex yien yawg tix heue. Ka daux praix haktiex Yaong Soi, kawn koe cub pwi pa yuh kaing tud kaing rhim:, pa mawh pwi con pwi cam:, pwi briex pwi lak khankix tom nie heue. Mawh kheu krax bung: krax kwang simieing

an heue. Ka daux bawg yam an, pie simieang vawng pa giex kwang haktiex khankix tix blah kawx, kawn yuh tix ih mau con praok tau mai: pwi pa yuh kaing tud kaing rhim khankix heue.

Ka daux baux bawg yam an dix, ka daux haktiex Yaong Soi tan:, cao giex kaing : plak ex kawn paraog , mawh Tax Khwat Veng, Tax Sam Kat, mai: Tax Nyi Pao heue. Ka daux haktiex yaong Soi, kied haoh hun jung pwi, mai: sidaing seesan ka pwi yuh lah lai khankix heue. Vieang mawh nan, mawh kheu can cao giex kaing khankix tix blah, ih mau con praok, mai ploi akhwang: ka pwi tud pwi khim: khankix, pa mawh pwi sawg tix cie sin hah brie yie pwi heue. Pwi con khankix sidaing nie, baoh haktiex an ku dah ku dee heue. Mawh kheu kied nie pwi con ku dah ku dee, pwi yuh lah, yuh lai ang lai pon hoek ka daux haktiex yaong Soi heue. Dee mawx angah, pwi con pwi briex khankix koe ka daux haktiex an, mai: pwi haktiex kied koe krax pa sung sang rhawm rhi kheu grawng an heue. Pwi haktiex khankix ang lai nyawm

yuh tix ih kaing jhaw, pie pa lailing tix hu lawng krax sinax nyiex liep yaong dee mawx angah, hoik koe pa nu son pwi haktiex heue. Ka daux bawg yam an, Tax Tao mai: Tax Sah, ang khaw caw rhawm rhi ka ceu pa lih mawh ka picang haktiex dee ot dee koe tix, mai jah tix kum: kawng: paox tix, krai lao grawng : kaing ceu pa yuh kwad pa giex kaing: khan kix, ang lai khaw caw mai: been ot kawn pwi ka picang haktiex heue. Tax Tao: mai: Tax Sah tom kum: kawng: krai lao ka paox tix, mai: sawg tix yaox daux krax daux blawng, mawh ceu pa yuh ka mawx heue. Yam hoik kriem tawng kix ka grawng: an mhawm mhawm, grawng mawh jao krax pa ih mau con praog khaing pwi yuh con , kiex jah tix keut kaing pa yuh tix, sonsang yien: yawg haktiex, mai: son sang mhawm ot singeh koe pwi haktiex khankix heue. Kheu pwi meung kied kha rhawm rhi tix, jao kaing pa ang rah ang see, mai: ang nyawm yuh tix ih kaing jhaw, mai: ang nyawm lai ling ing tieang tix yuh tix ih lah lai heue.

Tax Sah mawh pwi lhak haing:, mai: pa chix keut chix sawn son pwi haktiex heue. Nawh moh ka kaing ceu pa rah pa see, mai: pa khaw: pa caw heue. Nawh moh ka pwi hun:, mai: koe rhawm ka kaing: pa mhawm son pwi tang kaux khankix heue. Yam yaox simieang Hawx krax pa im ju Tax Sah mai: Tax Tao, kix kied khaw: caw rhawm rhi ka been kiex, mai: kix kok tix shao ka kiex ka daux kaing haktiex heue. Simieang Hawx tawx beeh glawm: cao giex kaing ka Tax Sah mai: Tax Tao: , mai tawx ceu kaux plak lox hawx heue. Kix tawx ceu kaux Tax Sah mawh Thing: siling Vu: , mai: kix tawx Ceu kaux Tax Tao: mawh Thing: Shing: Veung heue. Mawh kheu sidaing khaw caw been krax ot Tax Sah, mai: tawx ceu nawh mawh Thing: Siling vu: heue. Mawh kucu sidaing koe rhawm rhi kix ka Tax Sah, mai: kix sidaing meed ka nawh , kix tom kok ceu kaux nawh ku ceu jao pa moh kix ka been ot Tax Sah heue. Yam jah simieang Hawx tix tawx beeh glawm ka Tax Sah . kix tawx ceu kaux cao giex kaing ka nawh, mai:

kok ceu kaux kwad giex nawh mawh  
( Ta: Tui: Cang) heue. Khaix an , kaing yuh nawh  
nied tix haok huan: hu tix ngaix hoik tix ngaix , mai:  
pwi haoh pwi hun kawx gaux rhawm ka krax pa thong  
pa bung nawh heue. Pwi meung khankix kawx , rom  
tix yaog min: Tax Sah mai: Tax Tao, mai: tawx rieng  
rao ka kaing krax bung krax kwang kiex heue.

Daux bawg yam an , cao giex kaing plak  
haktiex yaong Soi , pa mawh Tax Khwat Veng mai:  
Tax Sam Kat , ang lai pon kieh haktiex yien yawg tix  
, Simieang Hawx khankix kawx keut sawn: son sang  
pon yaox tix ih mau yie , mai: cao giex kaing plak  
haktiex khankix , cu lox pa krai simieang hawx , mai:  
kix rom tix tawx rieng ka pwi con pwi cam: pa yuh  
kaing tud kaing rhim khankix heue. Yam kix cao giex  
kaing khankix yaox ka kaing pa ang khaw ang caw  
yuh nan:, mai: con cam: nied tix baox kin tix ngaix  
hoik tix ngaix , Tax Sah mai: Tax Tao: ang lai pon  
yaox ka krax kham: geu pwi haktiex , mai: jah tix thi  
ka pwi pa tud pa rhim khankix heue. Yam an , Daux

veng Yaong Soi tan , koe lhang: nyiex (700) nyiex  
pai , mai: jung pwi dex koe been (5000) phwan rheng:  
kaux heue. Nyiex Yaong pa dex hawt veng Yaong  
Soi, an, mawh Yaong Pang Nhai:, Yaong Rho  
Mawng, Yaong Rho Nam , Yaong Rong Rhawng ,  
Yaong Mam Mhat , Yaong Sho , Yaong Peng , Yaong  
Man Raix , Yaong Rawm: Daw , Yaong Rawm: Daw  
Sch, Yaong Tung Mun , Yaong Silee , Yaong Pang  
Ried , Yaong Ta Vo: , in khankix heue. Can nyiex  
yaong in khankix , mawh nyiex yaong pa sitoe hu ing  
ka daux veng Yaong Soi heue. Kheu jao pa ang koe  
pa nhim pa yien yawg , mai: koe pwi tud pwi rhim ka  
daux haktiex an ku dah ku dee, pwi nyiex pwi yaong  
khankix ang koe panyawm rhawm nyawm rhi ka heue.  
Tax Sah mai: Tax Tao yaox ceu pa kha rhawm pwi  
haktiex khankix mai: viex rhawm tix jah yuh kaing  
pa keung pa caw tix yuh son pwi haktiex heue. Kiex  
kraix khrawm krai lao lox, ka cao giex kaing ku nyiex  
ku yaong ku cub ku caw, mai: kum: kawng : ka cao  
thong cao bung ku kaux mai: cub kwad song nong



yu kwad nyiex miex yaong khankix heue. Kiex krai  
 lao pwi mhong grawng: ceu pa kha rhawm kha rhi  
 pwi haktiex, jao kaing yuh pwi tud pwi rhim khankix  
 heue. Kiex kieh pwi tawng, son sang laux lak pak  
 leeing pwi ang mhawm daux haktiex in. mai: krai  
 grawng: mawh beeh mawh glawm pwi haktiex  
 khawm uik heue. kiex kieh pwi haktiex mai: pwi  
 nyiex pwi yaong, doh rhawm: doh rhi ka ceu pa yax  
 kix tix kham geu, kheu pa yuh pwi tud pwi rhim khan  
 kix heue. Khaix hoik doh rhawm kix ka lox krai lox  
 iao Tax Sah mai: Tax Tao, kix rieb tix teei lox pa  
 krai kiex heue. kix tang teei beeh glawm: tix pah yum  
 ka pwi pa yuh kaing ang mhawm ka daux ru ceu cad  
 mawx ka daux ru ceu cad an heue. Kix pah yum ka  
 cao giex kaing pwi con pwi briex khan kix heue. Jah  
 ka daux bawg yam an, haktiex yaong soi koe pa yien  
 pa yawg heue. Pwi con pwi cam: mai pwi tud pwi  
 rhim:, hoik yien hoik grai hu heue. Khaix hoik yien  
 hoik grai pwi pa simie tix ih sin yie cie pwi khankix,  
 pwi nyiex pwi yaong, khankix mai: pwi haktiex

khankix koe pa gaux rhawm nyawm rhawm ka daux  
 kaing can pa yuh tix heue. Mawh kheu yien yawg  
 haktiex, pwi yuh lah yuh lai kawx, lai ling ing ticang  
 nyawm nyawm, nyiem nyiem, mai: pwi hu pwi ing  
 son Faine ihaw ku ceu gaux rhawm gaux rhi khawm  
 hu khawm ing tix, ang koe pa lhat pa graung heue.  
 Tax Sah mai: Tax Tao yuh lung yuh loi tix yuh haktiex  
 nhim, awm pa hoik tat kiex tix deuh, sivoe ang nyang  
 yuh tix ceu hoik tix ceu heue. Kawn rai pwi meung  
 khankix kawx, yax ka krax bung krax thong Tax Sah  
 mai: Tax Tao, mawh pa rah pa see pa khaw: pa caw:,  
 kix rom tix hawt jawh tix yuh hu tau mai: kiex heue.  
 Yam pwi meung hoik tawng kaing na yuh Tax Sah  
 mai: Tax Tao, mawh pa koe bwan son son pwi meung,  
 pwi khawm uik rom tix joh jhan, yaog yaing ka kaing  
 can pa yuh kiex heue. Pwi haoh pwi hun gaux rhawm  
 gaux rhi hawt khaix Tax Sah mai: Tax Tao heue.

Khaix hoik thi Tax Sah mai: Tax Tao ka been  
 pa ang rah ang see, ka daux hak tiex Yaong Soi ku  
 dah ku dee, mai: haktiex koe pa nhim heue. Mawh

kheu nhim haktiex, Tax Sah, mai: Tax Tao: tawx lox hu ka kwad nyiex miex yaong Ku dah ku dee heue. Yam an, pwi mhong lox kok Tax Sah mai: Tax Tao: Pwi viex kraung lah kraung lai tix hoek, ka daux haktiex Yaong Soi mai: viex kraung khri kraung mau ku ceu hoek yuh lai geu heue. Hak tiex Yaong Soi, deeh koc krax haok huan nie lheu khaing singaix prim heue. Tax Sah mai: Tax Tao:, rieb tix cawng khrawm lieak ka can kraung mau kraung khri pa hoek pwi tix coh khankix mai: yuh num lai son pwi haktiex heue. Kiex goih tix tawx num ka pwi pa ang koe num, mai: tawx rieang rao kieh pwi co ca tix yuh lah lai heue. Pwi lhak pwi haing: khan kix, kiex tawx rieang rao kix mai: kieh kix nied tix yuh lai geu sonsang baox koe rieang pwi haktiex heue. Can pwi pa ot plak haktiex, Rho Meung Rho Nam, Tong Mun, Pang Pat, Pang Nhai, Ang Ried, Ta: Vo:, Khawm ceu pwi paraog ceu pwi miien khankix, hoek tix tei num mau ka Tax Sah mai: Tax Tao, mai: yuh lah lai gaux rhawm gaux rhi heue. Krax kwang krax bung Tax Sah mai:

Tax Tao nied tix haok huan, mai: kiex baox ao: kaux sidu ceu ku dah ku dee heue. Pwi pa ot ku haktiex, mhong grawng pa nyawm ot nyawm koe haktiex Yaong Soi. pwi ghrang: paox tix hoek hu yuh lai geu heue.

Mawh kheu yam an , mawh bawg yam kwang Hawx Kaw Ming Tang haktiex an , simieang Hawx Kaw Ming Tang kawx , yaox ka pa jiet chix thong bung Tax Sah mai: Tax Tao ka pwi haktiex, mai: khaw caw rhawm ka been krax bung krax kwang kiex heue. Simieang Hawx khaw caw rhawm ka krax Kwang kiex , baox hawt joh jhan ka been krax kwang kiex mai: tawx rieang rao ka kiex heue. Jao pa chix thong chix bung Tax Sah mai: Tax Tao kawn rai pwi sin tix , mai: kieh haktiex koe pa haok huan tix ngaix hoik tix ngaix heue. Yam khaw caw rhawm rhi simieang Hawx ka kiex , kix yaog lhaong Jhaong ting ka ceu kau Tax Sah mai Tax Tao heue. Tax Sah mawh pwi pa cheung ka plak kruh naing heue. Siyiex tawx ka nawh siawp sibrawm pa chix giex kaing: plak kruh

paing heue. Nawh yuh naing dee mawx pueah, nawh  
 pex naing puing tix heue. Nawh koe siawp sibrawm  
 plak puing naing, mai: pex naing puing: tix jheeng  
 iheeng heue. Simieang Hawx khaw rhawm ka pa kied  
 cheung nawh. kix vaog ceu kaux nawh mai: vaog  
 simieang mawh nawh, tawx ara simieang mawh Tax  
 Sah, kieh mawh ( SILING KWANG: ) heue. phan  
 toe dee bleeh siling kwang: an- plak lox paraog,  
 mawh cao kwang plak kruh naing heue. Mai: kix  
 tawx ceu kaux simieang mawh Tax Tao ( SHING  
 CANG ) heue. phan toe dee bleeh shing cang an plak  
 lox paraog, mawh cao kwang plak been heue. Tax  
 Sah mai: Tax Tao: ih rhawm rhi si... cu  
 lox cu sikah paox tix heue. Lheu khaing an, kiex yuh  
 kaing pa khaw pa mhawm son pwi meung, mai:  
 kham: geu pa nu son pwi haoh pwi hun heue. Mawh  
 kheu nan, khawm praog khawm mien, mai: khawm  
 hawx khawm shieam kawx, moh ka been pa bung  
 kwang kiex, mai: joh jhan tawx rieang ka kiex heue.  
 Haktiex yaong Soi ku dah ku dee, hoik naog pwi

lailing yuh lah lai, heue. Krox haok: Frax huan kawx  
 nied tix baox koe tix ngaix hoik tix ngaix heue. Simex  
 sibon, pa ieak pa ting, yaox tix lailing ing tieang:  
 mhawm mhawm. kheu ang lai koe ceu pa lhat pa  
 graung heue. Tax Sah ao: kaux sidu ceu mai: nwi  
 meung kied moh ka nawh heue. Mawh kheu caw nie  
 koe rhawm koe rhi pwi hak tiex ka nawh, bawg tix  
 blah, pie kox camaox pwi tix yaox ka Tax Sah, kix  
 krai ca maox tix mhawm, mai: gaux rhawm ka tete  
 heue. Pwi tix kaux krai nawh, Yam hoik ca maox tix  
 yaox ka Tax Sah Yam mawx ang ah, yie chix lih koe  
 pa mhawm daux kaing pa yuh tix heue. Phan keut  
 prawng: an, ex tawng pwi sidaing moh ka Tax Sah  
 khawm rhawm khawm rhi tix tete telai heue.

### Been ot been koe Tax Sah

Tax sah hoik dawg mawh pwi koe rhawm ka  
 ceu pwi tix tom yam mawh nawh kawn nyawm heue.  
 Nawh koe rhawm mhawm pieang pwi khawm uik.  
 mai moh ka been pa khaw pa cow pa rah pa see heue.

Nawh lailing daux yaong, yie sawg tix jhak krax ot pwi yaong, mai: Sawg tix jhak ka kaing pa yuh pwi khankix heue. Nawh koe rhawm ka pwi hot pwi sibhawm, mai kawn doe miex mai khankix heue. Nawh ang rhawm jhak ka pwi pa yuh kaing pa ang khaw ang caw, mai: pwi pa nunai cainga paox tix heue. Nawh sidiex kawn rai pwi meung son sang nyawm ot siu koe pwi awm paox tix ku nyiex ku ma: heue.

Tax sah koe rhawm ka ceep tix kraung paraog, mai: ceep kiep man jheeng jheeng heue. Nawh moh tix yawt lawk sup lang:, mai: moh ka moik paraog heue. phan Nawh ih moik yam mawx angah, Nawh koe rhawm tix sau ih ka daux tawg khaox, pa mawh kraung priex pa hoik dawg shao ex kawn vax tom ju tax yiex miex keeing, tax du yie die ex dix heue.

Been krub Tax sah mawh been muig, mai: deuh been krub tix ting ceu heue. Mawh kheu hoik luan mawh been krub miex keeing aux dix, aux tom

krub tom yam in ah nan heue. vieang mawh nan can kawn praix nawh ku kaux, simie tix krub ka been pa yuh ka mawx ang ah, nawh ang sax teh thieang ka kawn praix tix heue. To kaux Tax Sah kawx, phan sara cao sidiex cao gau hock mie bawg, yam mawx angah, nawh kied koe rhawm rhi tix rieb teei ka kix mai koe rhawm tix kieh kix rawg bwan ku jheeng jheeng heue. Nawh moh ka sara cao sidiex cao gau, mai: moh tix ngied gum lox Siyiex heue. Phan hock bawg yam yuh kix "Vaw pa mawh bawg yam num khraox, nawh yie kok ka sara ting 'Yaw Sux Chin' hock tix ih "Vaw mai: kieh nawh rawg bwan son kix heue. Vieang nawh mawh pwi krub ka muig kawx, nawh kawx sidaing koe krax yum rhawm ka Siyiex cao phan cao yuh haktiex raoma heue. Nawh chix een rhawm ka Siyiex leeing ju, mai: simie tix kieh sara cao sidiex khankix rawg bwan. ka son nyiex ma: tix, yam lailing cao sidiex plak dee ot nawh, yam mawx angah heue. Nawh koe rhawm ka krax rawg bwan jheeng jheeng heue. Nawh gau kawn praix tix

krub siyiex mhawm mhawm heue. Krub siyiex pa tix angah, nawh krai ka kawn praix tix, nhie kix krub khawm rhawm khawm rhi tix mhawm mhawm heue. Nawh koe krax nab krax yam ka been krub tix mai: been krub pwi heue. Viang nawh mawh pwi pa krub muig kawx, rhawm rhi nawh yum rhawm grawng pa koe Siyiex cao phan cao yuh mai: een rhawm ka Siyiex daux rhawm tix heue. Viang nawh ang kok ceu kaux Siyiex, nawh yie khan kheu tan lu ka pwi pa yuh kaing jhaw Siyiex khankix heue. nawh ang goih been krub tix, mai: nab yam ka been krub pwi tang kaux heue. Phan Sara cao sidiex hoek ka daux nyiex ma nawh, nawh sidaing gaux rhawm mai: sidaing rien rhawm tix priex ka nyo sinie, khawm kawn nyiex kawn ma nawh khawm uik heue. Mawh kheu nan hawx shiem, paraog mai pwi tang ceu khankix, kied nab yam yungyi ka simieang tax sah heue.

### Grawng lih simieang Tax Sah khing haktiex dee keh tix

Mawh kheu hoek hawx Raoh ka daux haktiex Yaong Soi, mai: giex kaing: kwang bung haktiex Yaong Soi ka been pa kin pa nu ku Ceu, pwi haktiex yaox ux khant: geu pa kna mawm kna mi heue. Khaix hoik hoek hawx raoh tix kwang ka haktiex baoh dee ot yaong Soi, hawt sivie veng an khawm uik, 1951 num. Tax Sah mai: Tax Tao. viex pwi yaong hu, mai: dux tix ot plak haktiex Yaong Lawx heue. Viang mawh kawx nan, to kaux Tax Sah kawn hu to ot ke daux Pang Naix, Dex Veng Nam Mu Se, mai: ot tan ra num heue. Khaix an 1953 num, deeh lih khaig haktiex Nam mu se yaong pang Naix, deeh ing ka daux Yaong Lawx heue. Khaix hoik ot nawh daux Yaong Lawx been tix num, 1954 num, nawh baoh deeh hu ot plak haktiex Mang Shang, been ra num heue. 1956 num. nawh deeh ing plak yaong Lawx, mai: ot tan tom rheung num heue. Ka daux yaong lawx tan, koe lhang nyiex pwi yaong soi pon siyieb

pai 400 lhang nyiex heue. Khaix hoik ot kix ka daux yaong lawx been (20)num, kruh naing " Komyunit" laig hoek ka daux haktiex vax, ku dah ku dee. Tax Sah mai: pwi yaong soi pa ot yaong lawx tan, to hu ot seh krong ka daux haktiex Nam phak leun, daux baux veng Tang Yan, tom sidah hoek yam in heue.

Yam ot Tax Sah mai: Tax Tao khawm pwi yaong soi khan kix ka daux yaong lawx, Vawng: simieang Man kawx, khaw rhawm ka been krax bung krax kwang kix, mai yum rahwm ka kix, tom mhaing tix tawx kraung naing ka Tax Sah mai: Tax Tao, son sang pau sang kwang ka haktiex, mai: sonsang tieb tie ka pa caox pa caig khankix heue. 1966-1967 num Tax sah mai: Tax Tao teei kraung naing vawng simieang Man , mai: kwang kia: pau ngom ka haktiex Yaong Lawx ka heue. Vieang mawh kawx nan , mawh kheu laig Cub kruh naing ting komyunit ka daux haktiex vax , can kruh naing pa koe ka daux meung vax khankix kawx , ang lai chix ot , mai: lih hu tom hoek plak seh krong heue. khaix hoik thang tix rieb

soing kruh naing komyunit , mai: ang lai pex ka . kix . 1972 num Tax Sah mai: Tax Tao dech ap kraung naing pa hoik teei ka vawng simieang man ka kix , ka daux veng Ho pang mai: Veng kon long heue.

Khaix hoik laig hawx raoh ka daux haktiex Yaong Soi . Kawn rai pwi sin hoik tang tix jah suksak , grawng: krax ot krax koe tix heue. Pwi ang lai rhawm yuh tix ih kaing , kheu koe been pa tich pa loh ka daux haktiex dee ot dee koe kix heue. Kix yaox tix puing naing tix vud tix vud , mai: ang koe bawg yam yuh kaing nyiex kaing ma tix heue. Kheu ang lai koe pa yien yawg daux haktiex dee ot tix , Tax Sah mai: Tax Tao tom viex pwi vaong lih hu mai: hu sawg dee ot tix plak Yaong Lawx heue. Yam hoek kix daux yaong lawx , kix baox sau rieang rao tix yuh kaing , sonsang haok huan plak krax ot krax koe tix heue. Tax Sah mai: Tax Tao baox nie lheu thong gau ka pwi haktiex , lheu khaing: glang: ka: singaix pa hoik luan heue. Kiex nied tix coca thong bung kawn rai pwi sin plak kaing jhaw ku ceu heue. Mawh kheu

kawn khraox hoek kix khaing: haktiex prim mai: ot ka daux haktiex pa khraox, son ang pwi koe krax saux krax ngia, son ang pwi sang yaox krax tug krax kha:, ka ceu pa ih pa un, mai: sonsang nyawm ot siu koe pwi, awm yam ot kix daux nyiex prah yaong prim heue. Kix thong gau paox tix yuh kaing, mai: sau ricang sau rao sidiex gau thong bung pwi ka kaing jhaw pa mhawm pa khaw: ku ceu heue. Can kawn rai pwi meung kawx, cu ngied ka ceu pa thong pa bung Tax Sah mai: Tax Tao:, Kheu nan, pwi koe krax haok krax huan, mai: nyawm ot nyawm koe heue. Kix coca mai: koe krax pa ih rhawm rhi simau paox tix heue. Khaix hoik coca kix mai: yuh kaing jhaw pa yuh tix mhawm mhawm, kix baox koe krax haok huan ting lhaong plak krax ot krax koe tix, tix singaix hoik tix singaix heue. Yam ot kix daux Yaong Lawx, lhang nyiex koe (400) nyiex heue. Kheu pwi haoh hun hu tix ngaix hoik tix ngaix, daux krax lah lai kawx baoh hu sipie sipie, pwi yuh lai laig laig lih lih heue. Yam yaox Tax Sah ka pa koek pwi yuh lah lai

khaing ku prai ku klawng: mai: khaing ku nyiex ku yaong, nawh kum : mai: paox kwad song tix, mai: kix jah tix paoh lah ka daux Yaong Lawx heue. Yam jah kix tix paoh lah tan, can pwi pa hoek tix coh kraung khrai, mai: pa ih pa un ku ceu, hoek tix paung pan ka daux nyiex ma Tax Sah heue. pwi pa hoek coh plix khaox mai: taux lhax khankix, phan kix ang tax kraung cox, Tax Sah teei tix lieak hu uik, son ang pwi hoek laig lah, sang laux rhawm ka Lah hu tix heue. Tax Sah keut son pwi tang kaux ku jheeng jheeng heue. Nawh, Kham: geu tix som son pwi tang kaux, son sang mhawm ot singeh koe pwi awm paox tix khawm uik heue. Nawh koe rhawm koe rhi ka pwi nyiex pwi yaong heue. Nawh simie pwi khawm uik haok huan, mai simie tix kieh pwi koe krax kub ih kub un khawm uik heue. Nawh sawg daux krax pa haok huan, son pwi meung, mai: yuh tom pon kieh pwi hoek ka daux krax an heue.

Yam ot kix daux yaong lawx, kix hu yuh lai tom hoek plak haktiex Meung Thai heue. Tix blah,

hu plak haktiex cing Tung, tix bleh hu plak veng Tang yan heue. Kheu krax pa thong pa bung Tax sah ka pwi yaong khankix, simex khankix hu yuh lai dee singai, mai: sibon khankix. hu vuh lai dee dex heue. Kawn nyawm na cao na keuno tix oau ninonva cuyi, kiek kix hu gau lai dee dex dee singai ku dah ku dee heue. Pwi chix pwi tawng pwi lhak pwi haing: lih koe tom nie ka dau pwi Yaong Soi heue. Yam laig been komyunit daux haktiex vax, mai: hoek ka daux haktiex Yaong Lawx 1971 num heue. Jah yam an, Tax Sah mai: Tax Tao: baox thong pwi yaong hu ot plak haktiex Nam Phak leun:, mai: nak vaong khraox tan heue. Yaong an mawh pa koe daux baux veng Tang Yan, pa kawn koe tom singaix heue. Yam jah tix pak yaong ka daux Nam Phak leun:, mai: krax ot krax koe bawg yam in, kied tang siyox miex nyao heue. Tax Sah mai: kwad song cao thong cao bung ku kaux, ih rhawm rhi simau paox tix, mai: giex kwang nyiex yaong ka daux krax moh

krax rhawm, tom lih koe krax haok huan ka heue. Yam in yaong Nam Phak leun: hoik lih awm veng ieak tix mu heue. nawh kheu nyawm tix ot, vicang mawh daux yaong kawx, hoik awm ot daux veng heue. Grawh grawng: nawh pwi nyiex pwi yaong cu ngied ka lox sidiex kwad simieang, mai: ot tau ka daux pa moh pa rhawm, tom yaox tix koe pa nyawm ot ka heue. Pwi yaong Nam Phak leun khawm uik, mawh lox tix mu hu tix dieang, hawt khaix law daw khaix caong pa thong bung: Tax yiex miex keeing khankix ka kix heue. Mawh kheu Tax Sah mai: Tax Tao, Khawm kwad nyiex miex yaong khankix, hoik thong gau daux krax ka kix heue. Kheu kix ang lai tik lai vud ka lox krai lox lao kwad simieang, mai: Tax yiex miex keeing khankix, krax pa gaux rhawm nyawm ot tom baox nied koe hu sinyek sinyek heue.

Mawh kheu bwan son Siyiex pa ting pa lhaong ka picang simieang Tax sah, jah tom yam



leak nawh dix, tom sidah ju nawh, nawh kied  
 sidaing mhawm krax nyawm ot nyawm koe tete  
 heue. Jah yam mawh nawh kawn nyawm tom  
 sidah nik ju nawh picang haktiex, nawh sidaing  
 non hu non ino, mai non subshah yuh kaino an  
 kaing in, kheu nawh mawh pwi pa mhawm krax  
 nyawm ot heue. Krax saux krax ngia ang ot koe  
 , vicang saux ceex ceex cung cung, ang ot  
 mawh saux pa kiek ang pon hu pon pon ing,  
 heue. Kawn praix nyiex ma nawh khankix, ang  
 sa phex yaox tix khi rhawm son keeing tix kheu  
 Sidaing nyawm ot nyaum koe nawh jheeng jheeng  
 heue. Kheu nawh jiet chix ot chix koe, mai  
 chix rien rhawm ka pa ih pa nyaux, mai: chix  
 rien chix khre krax ot krax koe tix mhawm  
 mhawm son to kaux nex nham tix, nawh tom  
 yaox krax nyawm ot nyawm koe ku jheeng  
 jheeng heue. Ja lao to kaux nawh ang khre rien  
 to kaux tix, pic kawn nyiex kawn ma nawh  
 khankix kawx, nawh sidiex gau kix, sonsang chix

khre chix rien kix krax nyawm ot tix ku jheeng  
 jheeng heue.

Simicang Tax Sah, gau sawn thong bung  
 ka kawn nyiex kawn vaong tix daux kaing ku  
 ceu bene sonsang chix haok huan pwi ka plak  
 ku ceu, nawh sawg daux krax, mai: gau thong ka  
 pwi heue. Jah tom yam mawh nawh kawn nyawm  
 mah juan jeh mawh tix yuh koe nyiex ma, nawh  
 sidaing keut sawn coca son pwi haoh pwi hun  
 heue. Nawh kawx sidiex gau kawn yaong tix yuh  
 nan heue. Nawh koe mawm tix kiek pwi khawm  
 uik kub koe ka krax ot krax koe awm paox tix  
 khawm nik heue. Yam laig boek hawx ka daux  
 meung paraog dix, nawh sidaing yuh naing sonsang  
 lawd luan kawn rai pwi meung khaiing krax pa  
 gut pa yeen pa nunai pwi, pwi tang ceu tang cac  
 heue. Tax Sah kham: pa nu son pwi haktiex, son  
 sang yao pwi haktiex tix yuh ih kaing jhaw  
 mhawm mhawm heue. Nawh puing naing yan  
 mawx angah, nawh yie chix pex ka naing puing

tix jheeng jheeng heue. Bawg tix blah nawh dex sang caw tix lhah krax yum daux naing, tix vud tix vud heue. Kheu jao pa keut sawn nawh son kawn haktiex, son ang sang kha rhawm rhi greem tawm: taix pwi tang ceu, nawh tom, kham: geu tix yuh naing son haktiex heue. Vieang mawh nan, simieang Hawx ting rieng ting rao, mai: jung pwi kied haoh kied hun, ka pieang an, kix mawh vawng pa koe pingnya cuyi mai: ang lai chix pex ka kix tix bawg kawx heue. Mawh kheu Tax Sah tawng ka grawng pa sidaing ting rieng ting rao kix, nawh tom viex pwi haktiex lih khaing haktiex Yaong Soi mai: to hu ot plak hak tiex yaong lawx heue. Khaix hoik ot kix haktiex yaong lawx been tix nga: (20) num, kheu hoek komyunit tan tom baox lih hu khaing tan, mai: hoek ot dau baux veng Tan Yan Yaong Nam Phak leun heue.

### Yam sidah ju simiceng Tax Sah

Simieang Siyiex tawx bwan son krax nyawm ot siu koe ka simieang Tax Sah, mai: kieh nawh lang: im prim: ju sinax pao kwad nawh khankix heue. Baux haktiex yam in, mawh baux bawg yam sidaing haoh jhawm saux pieang haktiex in tete heue. Vieang mawh nan, simieang Tax Sah pon bwan son pa tang siyox khaing paox pwi, mai: pon tix im ju tom hoek 103 num heue. Grawh grawng pa krai ex, Tax Sah pon bwan son pa tang siyox khaing paox pwi, mawh kheu lang ju nawh tom hoek tix siyieh pai num heue. Siyieh teei ju nawh ka daux 2003 num khix kao (11) singaix plak pon ngawb(9) nari heue. Simieang Tax Sah, keh ka daux haktiex Yaong Soi, mai: nawh sidah ju ka daux hak tiex baux veng Tang Yan daux yaong Nam Phak leun heue. Yam grai ngai Tax Sah yam hoik dud rhawm nawh, kix tawx lox grawng hoik dud rhawm

nawh ka ceu cad nawh pa ot plak meung Hawx  
 , mai: plak meung Man , mai: plak meung Thai  
 heue. Yam mhong pwi ceu kix pa mawh ceu cad  
 nawh , pa ot ku plak ku krax , ka grawng pa hoik  
 grai ngai simeang Tax Sah , kix lih khaiing dee ot  
 tix , dee mawx dee an , mai: khrawm paox hoek ka  
 daux haktiex Tang Yan, daux yaong Nam Phak  
 leun: , dee ot simieang Tax Sah heue. Can pwi  
 Yaong Soi pa ot ku dah ku dee, rawg bwan : yam  
 mhong kix grawng: pa hoik grai ngai simieang  
 Tax Sah heue. Kheu Siyiex kieh Tax Sah lang  
 im prim ju ka pieang haktiex in , tom sidah koe  
 in nawh 103 num . nwi kied daox deng: ka . mai:  
 gaux rhawm gaux rhi kheu nawh heue. paox  
 grawm Tax Sah mai: can kix cub kwad prim  
 khankix, hoik dawg grai ngai tom yam mawx  
 dix, Vieang mawh kawx nan . kawn khraox mhong  
 grawng grai ngai Tax Sah yam in pwi tom daox  
 deng: , mai: koe krax pa gaux rhawm kheu pa  
 lang im nawh pieang haktiex heue Dee mawx

angah pwi pa lheu ju khaiing tix siyieh num ang  
 lai hiex koe heue. Phan jhak ka pa kiied lang ju  
 Tax Sah , ex tawng mawh bwan son pa yuh  
 Siyiex , mai: tawng mawh kheu pa chix priex chix  
 rien nawh to kaux tix plak krax nvawm ot heue  
 kied koe krax gaux rhawm , mai: yaog yaw bwan  
 son Siyiex son kawn praix Tax Sah khankix heue,  
 kheu pa tawx simieang Siyiex bwan son krax  
 lang: im prim ju, ka keeing tix tete telai heue.  
 Ex yum rhawm grawng: , Siyiex tawx krax lang:  
 im ka keeing ex Tax Sah, sonsang yaox nawh  
 tix sidiex gau ka kawn nyiex pwi yaong mai:  
 nwi haktiex khankix heue. Nie lheu mawh ka  
 kawn praix daux nyiex ma nawh, pa mawh kawn  
 praix nawh , mai: kawn saux nawh , mai: kawn  
 sex kawn suix nawh khankix heue. Tax Sah ang  
 sa kieh nwi tang kaux laux rhawm kheu grawng:  
 tix heue. Nawh koe rhawm tix yuh bwan son ka  
 pwi khaiing , mai: ang doh koe rhawm tix tawx  
 krax laux rhawm ka pwi tang kaux heue. Pa sa

Mhong ex grawh grawng: kecing ex simieang Tax Sax , daux krax pa im ju nawh, jah tom yam awn ju nawh, tom sidah uik ju nawh, nawh ang doh rhawm tawx krax laux rhawm ka pwi tix kaux kawx, mawh ngie simie tix yuh kaing pa mhawm, mai: kaing pa koe bwan son son pwi tang kau ngie khaing: heue. Yam sikaw tix yaox ka grawng: krax pa im ju nawh, jah yam ieak yam aw. nawh, tom hoek yam kwad yam riex ju nawh, ex pon tix tawng ngie grawng pa mhawm pa koe ka nawh, mai: grawng pa keut pa sawn nawh tix yuh kaing pa koe bwan son son bawg yam pa sang hoek sivoe ngai heue.

Siyiex tawx bwan son ka Tax Sah, kieh nawh im ju tom rheung num heue. lang: ju ngoig ju, ang mawh pa koe daux: taix kawn pwi, mawh pa koe ka daux tawm: taix Siyiex tix kaux khaing heue.

2003 num khix kao: (II) singaix plak pon ngawb (9) nari, Siyiex teei ju simieang Tax Sah heue. Yam teei Siyiex ju nawh, nawh hoik koe ju 103 num heue. Yam teei Siyiex ju nawh pwi hoek khaing ku

nyiex ku yaong, mai: ku praix ku klawng: heue. Pwi pa hoek ka daux bang: tan, koe jung pwi kaing: rheng kaux heue. Ex deuh to kaux yum simieang Tax Sah (21) singaix heue. Vieang deuh to kaux yum nawh tom rheung singaix kawx, kiied koe pa singax pa mhawm, mai: koe grawng: kaing pa khaw pa caw heue. Pwi hoek pwi hu kawx, sidaing haoh hun, mai: pwi hoek ku kaux kawx, rom tix tawx min plak ngai ka simieang Tax Sah, mai: rom tix tawx rieang Rao ka daux kaing ghaok ka simieang Tax Sah heue. Cub caw kwad song nong yo khankix, kix khrawm paox tix kum, mai: krai lao lox sikah mai: paox tix, mai: kix krai grawng kaing pa yuh simieang Tax Sah heue. Cub kwad song nong yo, krai lox grawng prim: mai: pa hoik lih tix mawh ka daux krax im ju Tax Sah heue. Khaix an, cub kwad sibon khankix kawx khrawm: paox tix, kum: kawng: tawx rieang rao ka yiex simieang Tax Sah heue. Cub kwad bon khankix kawx, krai lao kah kum tau, mai: krai lao nang: ka lox krai Tax Sah, mai: krai lao grawng: kaing jhaw

pa yuh Tax Sah khankix heue. Bon tix blah, yiem yo  
 kheu pa byaong: rhawm kix ka simieang Tax Sah  
 heue. Can kix kwad riex ju, pa mawh simex sibon,  
 grum grieh rieh riem, naix num: kum: rhawm paox  
 tix, mai: kix rak rom grum phroik paox tix, yam yuh  
 grawng: krax hu simieang Tax Sah pa mawh bawg  
 ghoik ka son nawh heue. Cub caw kwad riex ju  
 khawm simex khawm bon, kaoh khaing ku nyiex ku  
 yaong, mai: khrawm: paox tix tau, ah lox leng:, ah  
 lox lai been prim: ku ceu, mai: rom tix tawx min  
 plak ngai ka simieang Tax Sah heue. Awm koe  
 been prim pa sax yuh cub kwad khankix, kix yuh  
 krax gaux rhawm, ih nyaux tau, kum kawng: tau,  
 ah lox leng tau, yiem yo tau, mai: klieh nyax tau  
 heue. Bawg yam yuh krax hu Tax Sah, ka daux  
 (21) singaix an, pwi pa hoek pa hu ku kaux ku  
 pwi, sidaing viex rhawm rien: tix yuh kaing pa  
 keung tix yuh, tan lu ceu pa keung tix tan lu  
 heue. Viex khawm rhawm khawm rhi tix yaog  
 min ka simieang Tax Sah, mai joh jhan yaog

yaing ka grawng kaing son pa yuh krax hu nawh  
 heue. Sinaw bon krih, kawm nyawm pwi awn ju  
 ku kaux kawx, kix silao gaux rhawm tix yuh  
 kaing krax teem krax coi ka daux bawg yam  
 heue. Kix ano laux ano leu tix cau rieng no  
 yuh lung kaing jhaw krax teem krax coi khawm  
 rhawm khawm rhi tix heue. Kawm nyawm simex  
 sibon, keeing griex miex pwi ku kaux ku pwi,  
 ang lai ot giex going, rom tix joh jhan teem coi  
 kaing jhaw son pa yuh krax tan krax lu yam yuh  
 krax hu simieang Tax Sah bawg ghoik son nawh  
 heue. Pwi pa hoek daux bang: yuh tan lu, son  
 simieang Tax sah vam an khawm uik ang koe no  
 saux pa ngia; mai: ang koe pa phit pa lud heue.  
 Simah simaing, mai: krax pru yaoh lhat graung  
 kawx, ang lai koe tix ceu kawx heue. Pwi hoek  
 ka daux bang an ku kaux ih rhawm rhi khei  
 mau paox tix, mai mawh rhawm rhi tix mu ka  
 daux kaing jhaw pa tan pa lu ku ceu heue. Cao  
 pa yun nex, cubcaw pa yuh tau, cubcaw pa kuh

cep, cubcaw pa lieak kraung, cubcaw pa khre rien, cubcaw pa khan kheu, cubcaw pa vai kraung, cubcaw pa kin rawm, cubcaw pa rieb nyo sinie, cubcaw pa yuh chax, cubcaw pa mhai carang krax tan, cubcaw pa ghaok hoek toek bleeh, cubcaw rawm: hax, cubcaw kwang kya:, cubcaw phak kraung praix, cub mawx cub an, kix tang teei beeh glawm kaing yuh tix kriem krie, mai: sau rieang rao tix teem coi joh jhan kaing tom sidah hoik heue.

Khaix hoik dud rhawm Tax Sah been(3) singaix jung pwi kied nie tete heue. Khaix an, sivoe ang nyang priex ka to kaux nawh, been loe pon singaix, pwi kaoh khaing ku krax ku laux baox deeh hoek, mai: pwi pa ot tom singai praix. hoek tix yuh krax nabyam ka to kaux' yum simieang Tax sah heue. can pwi pa hoek daux singaix hu tawx ka simieang Tax Sah dee ot nawh, kawn nie lheu hun khaing yam dud rhawm nawh loe son pon son heue. Kheu pa kied hun pwi, ex

ang lai chix tawng tix simin jung pwi pa hoek tan heue.

### SUM NYIEX SIMUIG TAX SAH

Mawh kheu cox khre priex rien tix deuh ka dee ot Tax Sah pa mawh nyiex simuig nawh, mai: can pa mawh kwad nyiex kwad yaong, khawm can kix pa mawh daok dawn kawn praix nawh khankix ku kaux, kraix khrawm paox tix kum kawng: grawng an tau heue. Sang caw tix deuh Tax Sah ot dee mawx? Sang cawx tix yuh nyiex simuig nawh yuh ka mawx, sang caw kieh pwi maw mawh cao yuh, kix khrawm tix kum: kawng: paox tix sivoe heue.

Khaix hoik grum hoek kix tix kum kawng: tau, kix tom tat lox grawng sang yuh nyiex simuig phao heue. Can kwad song mai: kawn praix Tax Sah khankix, grum rhawm tix deuh nyiex simuig Tax Sah plak klip singaix, daux gawng: simuig laong yaong Nam phak leun: tan heue. Kix jawg tix cox khre dee

ot mai: nyiex simuig mhawm mhawm mai: keut sawn  
 tix yaox pakpeung mai: mau shao: son simuig heue.  
 Kix kok ka pwi pa chix pa tawng ka kaing an khankix,  
 mai: kich kix tieag sawn: tix yaox pa lo ku ceu heue.  
 Khaix hoik tieag sawn: kix grawng: kaing ku ceu  
 son nyiex simuig an, kix jah tix ap pong kaing jhaw  
 pa yuh tix mai: krax rawg bwan heue. Kix pah lig  
 pah ia:, mai: yuh krax sdtan krax lu khan: kheu son  
 sang pon jah tix sum nyiex simuig Tax Sah phao  
 heue. Kix yuh awm pa koe krax grawng: pa keung pa  
 caw tix yuh, mai: sum nyiex simuig heue. Son Nyiex  
 simuig simieang Tax Sah, khawm uik khawm leeing,  
 caw tix uik mau 20 shien 2000000 plah heue. Can  
 mau uik son nyiex simuig simieang Tax Sah khawm  
 uikan:, mawh can kawn praix nawh ku nyiex ku ma  
 pa koe rhawm koe rhi tix tan lu ku kaux ku pwi heue.

## YAM HU DEUH TO KAUX YUM TAX SAH KA DAUX NYIEX SIMUIG

Khaix hoik deuh kix to kaux yum simieang  
 Tax Sah. (21) singaix, mawh kheu hoik hoek hawe  
 vam caw tix hu deuh nawh dee ot tix, tom jah tix cox  
 khre sonsang hu tawx ka to kaux yum Tax Sah daux  
 simuig phao heue.

2003 num haok khix kao tix (2) singaix plak  
 pon ngawb (7) taix nari, son sang viex To kaux Tax  
 Sah hu ka daux nyiex simuig ex jah tix cox khre mai:  
 pah mawie, pah lig, pah ia:, son sang ghoik tix yun  
 krax hu Tax Sah, mai ghaok ka nyo sinie, pa koe dee  
 dex dee singai ku dah ku dee heue. Can pwi na hoik  
 dha tix hoek pa koe tom nie mai: pwi pa baox hoek  
 khaing ku dah ku dee tom nie, grum greh daux krax  
 tan krax lu son pa ghoik tix ap poug to kaux Tax  
 Sah, mai: na yuh krax yaog min plak ngai ka nawh  
 heue. Ka daux singaix hu deuh to kaux yum Tax Sah  
 ka daux nyiex simuig, jah plak pon ngawb tom sidah  
 plak pon bo. can pwi nyiex pwi yaong khawm uik

mai: nyo sinie can pa hoek tan khawm uik, pwi gaux rhawm gaux tau mai: paox tix mai: rom tix tawx min plak ngai ka Tax sah heue. Pwi pa paung pi paung byaung mai: ghraoh tix angah, pwi pa paung sha mai: tah ting mai: ghraoh tix angah pwi pa yuh krax klieh krax nyax ku ceu mai: gaux rhawm gaux rhi tau angah, cie mawx cie an, cub mawx cub an, tang: yuh krax gaux rhawm gaux rhi ka daux singaix an, yam kawn koe to kaux yum Tax Sah heue. Mawh kheu pwi khawm uik simie tix yuh krax gaux rhawm mai: tawx min: plak ngai ka simieang Tax Sah heue.

2003 num haok khix kao tix (2) singaix plak pon ( 12 ) nari, viex to kaux yum Tax Sah hu daux nyiex simuig heue. Sivoe ang nyang viex nawh hu, can kix pa mawh kawn nyiex kawn ma: pa dex pa dawd tau mai: nawh khawm uik khawm leeing, khrawm paox tix mai: yuh krax nabyam yungyi ka keeing tix, ka daux bawg yam pa ghoik khaix heue. Kix hoik deuh to kaux yum Tax Sah (21) singaix , mai: sang hu deuh nawh ka daux nyiex simuig phao

heue. Can kawn praix nawh mai: ceu cad nawh, mai: paox nyiex paox ma: mai: pwi nyiex pwi yaong khawm uik, pa ot ku dah ku yuh dee krax nabyam yung yi ka Tax Sah, kheu hoik dex sang hu deuh to kaux yum nawh daux nyiex simuig heue. Kix viex krax tan krax lu, pa mawh kraung khrai mau khri, mai: ceu pa ih pa nyaux ku ceu, hoek tix tan lu heue. Pwi khawmuik, can kawn nyiex kawn ma: Tax Sah, mai: pwi pa meed pa tawng nawh, khawm kawn nyiex pwi yaong khawm uik , sidaing moh ka Tax Sah yam dex bawg yam sang viex to kaux yum nawh hu ka daux simuig, pwi niied tix sung sang rhawm, kheu sang yaox tix goih khaing simieang Tax Sah heue. Paox kwad song pa meed pa moh ka nawh khankix, grum on rob lawng: nawh, mai: sika ka to kaux yum nawh heue. Kix ah lox leng pa byaong rhawm ka Tax Sah, mai: simawd ka nawh daux lox leng, kheu kix kiied byaong rhawm ka Tax Sah, kheu sang yaox tix goih tang: ot khaing paox tix, ka daux bawg yam pa ang lai rheung heue. Can pwi hun cub mawx cub an,



g: khrawm paox cub paox caw tix, tix dah tix cub,  
 dah tix nyhawm:, krai lao paox tix mhong grawng:  
 x im ju Tax Sah simawd ka nawh, mai: rom tix  
 yx min plak ngai ka simieang Tax Sah heue. Ka  
 x bawg yam an, ca lao kawn vax ang yuh nan, pic  
 i tang ceu pa meed pa moh ka Tax Sah khankix  
 vx, khrawm paox tix simawd mai: krai lao ka paox  
 grawng pa koe krax moh krax rhawm Tax Sah ka  
 heue. Pwi hoek pwi hu khawn uik, mawh pwi pa  
 h khaing: ku krax, mai: khrawm paox tix ka daux  
 gaix hu deuh to kaux yum Tax Sah daux nyiex  
 uig heue. Ka daux singaix an , nyo sinie, hoik  
 g hoik kho: ka daux nyiex ma: yaong Nam Phak  
 n ku nyiex ku ma heue. Kheu pwi hoek tix hu  
 vt tawx ka to kaux yum Tax Sah ka daux simuig  
 e. Pwi ah lox lai rhax mai: rawg bwan son kawn  
 ex kawn: ma: Tax Sah pa koe ku dah ku dee heue.  
 cao giex kaing ka daux numli vax kawn Khrit  
 n rawm, pa mawh cub caw sara ting mai: sara  
 k khankix, hoek ka daux bawg yam an, mai: kix

rhax lai pa yaog yaw ka Siyiex tau, mai: rawg bwan  
 son kawn nyiex Tax Sah khankix heue. Pwi pa hoek  
 ku kaux daux pwi, rom tix tawx min plak ngai ka  
 simieang Tax Sah tau, ka can kaing ku ceu awm pa  
 keuvg: pa khaw: tix yuh heue. Pwi hoek pwi hu  
 khawm uik, yuh paox pie ka daux krax moh krax  
 rhawm tau, mai: klieh nyax tau, mai: ih nyaux tau  
 heue. Krax khan: krax kheu ka daux bawg yam an:,  
 hoik yuh ceu pa nyawm tix ih tix nyaux ku ceu , kheu  
 cao nyiex cao ma pa mawh kawn nyiex Tax Sah  
 khankix sidaing gaux rhawm ka can pwi pa hoek tix  
 jhi krax moh krax rhawm ka kix yam luan keeing kix  
 simieang Tax Sah khaing: kix heue. Cao nyiex cao  
 ma: pa mawh kawn nyiex ma: Tax Sah. khankix,  
 sidaing ting bwan son ka can nyo sinie pa hoek pa hu  
 tan: ku kaux heue. Kwad yaong Nam: Phak leun  
 kawx, gaux rhawm gaux rhi kheu hoek nyo sinie tix  
 tawx rieang rao ka yam grai ngai Tax Sah heue. Kwad  
 song pa koe beeh glawm daux nyiex yaong Nam Phak  
 Leun, krai lox ting bwan: son ka can pwi pa hoek

tawx ricang rao khankix heue. Khaix an kawn sibon simieang Tax Sah tix kaux, pa mawh yiex Vox Sang, nawh baox krai lox ting bwan: son ka nyo sinie, mai: ricb hoek toek bleeh ka nyo sinie pa hoek pa hu khankix, mai: krai lox grawng krax gaux rhawm kheu pa hoek tix tawx ricang rao yam glip ngai grai lox keeing tix simieang Tax Sah heue. Can pwi pa hoek ku kaux dauw pwi, kiied gaux rhawm gaux rhi tau, kheu pa mhong lox cao nyiex, mai: kheu pa koe krax moh krax rhawm mai: krax grum rhawm grum rhi kix. Yam yuh krax hu keeing tix simieang Tax Sah heue.

Yam dex sang yaog tix viex lawng: simieang Tax Sah hu ka dauw gawng simuig, can kawn praix nawh ku kaux hoek tix tawx krax nabyam ka nawh heue. Can kix pa koe beeh glawm: plak kruh naing, pa mawh nyawm lien khankix kawx khrawm paox tix, mai: kix viex kraung naing tix ku kaux hawt tawx simieang Tax Sah ka dauw gawng simuig heue. Kix puing nad cie tix ku kaux, jah ka dauw nyiex tom

sidah hoek ka dauw simuig heue. Pwi viex kraung ghraoh pa mawh byaung mai: sha mai: pi: ku ceu, hawt tawx ka to kaux . Yum Tax Sah dauw gawng simuig heue. Yam hoek kix ka dauw simuig, kix rob vung vicang nyiex simuig mai: kix ghraoh thiao tix, baox tawx min plak ngai ka simieang Tax Sah heue. Khaix hoik rob kix vung vicang nyiex simuig, mai: khaix hoik ghraoh thiao kix, tom tawx lox grawng: pa gawieh paox ka Tax Sah , mai: ghoik tix daing: ka nawh heue. Khaix hoik yuh krax nabyam yung yi ka Tax Sah , mai: khaix hoik tawx min plak ngai ka nawh ka ku ceu, mai: khaix hoik daing daw ap pong ka nawh, mai: teei lawng simieang Tax Sah, sau ka dauw nyiex simuig heue. To kaux simieang Tax Sah , hoik pon tix lawd luan khaing pa tauk pa mao ka pieang haktiex in , mai: hoik laux lee tix ka dauw pa yien pa yawg, mai: ghoik tix ap to kaux nawh dauw nyiex simuig. 2003 num, khix kao tix ( 3 ) singaix plak pon ngaix ( 1 ) taix nari heue.